

24. maj 2022

**Angutit pinngitsaalillugit ataatatut inissimalersinneqartannginnissaat anguniarlugu
inatsisitigut naartuersitsisalernissap periarfissaalernissaanik eqqussisinnaanermut tunngatillugu
Inatsisartut isumaat pillugu Inatsisartut Oqallissiaattut siunnersuut.**

(Inatsisartunut Ilaasortaq Anna Wangenheim, Demokraatit)

Demokraatit sinnerlugit Inatsisartuni ilaasortaq Anna Wangenheim oqallinnissamik siunnersuutaa Siumumiik imaattumik oqaaseqarfigissuarput.

Oqallinnissamik siunnersuuteqartoq maajip tallimaani Inatsisartut aalajangiiffisassaattut siunnersuutaa imm. 66 oqaluuserineqarpoq, aaliangiiffisassatut siunnersuutip siunertaraa meeqqat angerlarsimaffiup avataanut inissinneqartut taakkunungalu angajoqqaajusut Naalagaaffiit Peqatigiit Meeqqat pillugit isumaqatigiissutaat malillugit sullinneqartarnersut misissorneqassasoq. Siunnersuut meeqqat pisinnaatitaaffiunik illersuisoq taperserlugu Siumumiik ataatsimiititaliamut ingerlateqqipparput.

Ippassigami meeqqat pisinnaatitaaffii illersukutsooriarlugit maannakkut oqallinnissamik siunnersuut akerlerluinnaanik imaqarpoq. Tassami siunnersuuteqartup maanna anguniarpaa, angutit pinngitsaalillugit ataatatut inissimalersinneqartannginnissaat anguniarlugu inatsisitigut naartuersitsisalernissap periarfissaalernissaa. Tamanna isumaqarpoq arnap peersitsinissani akuerinngippagu, siunissami meerarpassuaqalissammat inatsisitigut ataataqanngitsunik imaappoq oqaluttuaq nunatsinni aqquaariingarpot uteqqissaaq allaanerussutuaralugu kalaallit politiikeriisa tamanna aaliangigarimmassuk.

Ilisimaneqartutut 1953 sioqqullugu nunatsinni meerarpassuit qallunaanik ataataqarlutik inunngortut, pisinnaatitaaffeqarsimannigillat pappiaqqatigut upfernarsaatitalimmik ataataqarnissamik kingornussinissamillu. Taakkua inatsisitigut ataataqanngitsunik taasarpagut, taakkuuppullu ulloq manna tikillugu misigissutsikkut anniaateqartut, kinaassusiagaasimasut pisinnaatitaaffiagaasimasullu. Taamatut iliuuseqarsimaneq akuersaerneqarsinnaanngilluinnarpoq taamaattumillu nukippassuit atornikuuagut politikkikkut kinguneqartitsiniarluta angusaqarlatalu.

Takorluulaariarsiuk oqallinnissamik siunnersuuteqartup isumaa malillugu, meerarpassuit inunngorarpata ataataminnek akisussaaffigineqarumanatik inatsisitigut illersugaasut. Taava oqaluttuaq aqquaariigarpot uteqqissaaq, meeqqat pisinnaatitaaffiinarneqassapput naak illersorniarlugin oqaluttuannguarluta. Tamanna Siumumiik akuersaarsinnaanngilarput isumaqaratta meeraq kinaluunniit pisinnaatitaaffeqartariaqartoq aamma meeqqap

pisinnaatitaaffia affaannanngortinnejqarsinnaanngimmat, tassami anaanaqarnissamik ataataqarnissamillu tamatta pisinnaatitaaffeqartariaqarpugut.

Sakkussaq pingarnerpaaq Siumumiik tikkuarsinnaasarput tassaavoq pinaveersaartitsineq, inuusuttut qaammarsaavigineqartariaqarput nammineq pisuussutigalugu naartuumik peersitsisaqattaarneq pinaveersaartinniarlugu aamma piumanngisamik meerartaarnissaq pinaveersaartinniarlugu. Tassami meerartaarsimagutta pisussaaffeqartariaqarpugut, akisussaaffeqartariaqarpugut immitsinnuinnaq eqqarsaatiginata.

Doris J. Jensen, Siumut